

Bataaxal bi Yàlla may

YUDD, mu bind ko

¹Man Yudd, jaamu Yeesu *Kirist, mi boka ak Saag ndey ak baay, maa leen di bind, yéen ñi Yàlla Baay bi woo te bëgg leen, te Yeesu Kirist aar leen. ²Na leen Yàlla may yërmande, jàmm ak mbëggeel.

Bàkkaaruu ñi weddi Yàlla ak seen muj

³Samay boka, bëggoon naa leena bind lool ci mbirum mucc gi nu boka, waaye lii moo gëna jamp : ma xiir leen, ngeen taxaw ci aar mboolem dëgg, gi Yàlla xasa dénk gaayam yu sell yi ba fàww. ⁴Ndaxte am na ay nit ñu ñeme Yàlla, ñu yoxoosu ci seen biir ; dañuy mbubboo yiwu Yàlla, ngir topp seen bakkan, di ci weddi Buur Yàlla miy kenn ak sunu Boroom Yeesu *Kirist. Fekk Mbind mi tëral na seen àtte bu yàgg.

⁵Xam ngeen loolu lépp ba noppi sax, waaye dama leen koy fàttali rekk. Xam ngeen ne Boroom bi musal na xeetam, ba génne léen réewu Misra, waaye gannaaw ba raafal na ñi gëmul woon. ⁶Te it malaaka ya jàppul woon ca daraja ja ñu amoon, xanaa toxoo fa ñu léen dëëloon, Yàlla yeew na léen buum yu sax, tëj léen ci biir lëndëm, di léen nége àtteb bés bu mag ba. ⁷Noonu itam dëkki *Sodom ak Gomor ak dëkk ya léen wëroon, dañoo sóobu ci njaaloo ak di def ay góor-jigéen, waaye àtte bi dal na ci seen kaw, ba ñuy ay tegtal ci ñiy yelloo sawara ba fàww.

⁸Naka noonu itam géntkat yooyu may wax ñu ngi sobeel seen yaram, di weddi gépp kilifteef, di xas doole yi ci asamaan. ⁹Waaye bi Mikayel, miy kilifa ci malaaka yi, di xëccook *Seytaane néewu *Musaa, bay xuloo ak moom, ñemewu koo àtte, boole ciy xas ; mu yem ci wax ko ne : « Na la Boroom bi mbugal ! » ¹⁰Waaye nit ñii may wax, dañuy saaga li ñu xamul. Te li ñu xam ci tañaxu sax, ni bàyyima yu amul xel, dañu ci yàq seen bopp.

¹¹Ñookay torox ! Dañoo jaar ci yoonu Kayin, sóobu ci réerug *Balaam ngir xalis, di bañ kilifteef ni *Kore, te dinañu dee ni

moom. ¹²Su ñu bokkee ak yéen reeru mbooloo mi, dañu ciy indi ay, niy xeer yu nëbbu ci biir géej ; amuñu genn gâcee, waaye dañuy giiroo te fonk seen biir rekk. Ñu ngi mel ni xiin yu amul ndox, yuy naaxsaay ci ngelaw ; ni garab yu meññul ci jamonoy meññeef, te buddeeku, dee ba wow koŋŋ; ¹³mel ni duusi géej gu mer, yuy gëq jëf yu ruslu ; niy biddiww yuy fàq, te Yàlla dencal na léen lëndëm ga gëna tar ba fàww.

¹⁴Enog, di juróom ñaareelu maam gannaaw Aadama, waxoon na ci kàddug Yàlla, ba weer léen ne : « Boroom bi wacce na ca asamaan, ànd ak ay junniy junniy malaakaam, ¹⁵ngir àtte ñépp, te mbugal ñi weddi ñépp ndax ñaawteef, yi ñu jëf ci ñeme Yàlla ; di léen fàttali it kàddu yu ñaaw, yi ñu ko tifaar ci seeni bàkkaar ak seen weddi. » ¹⁶Duñu noppee xultu, di jàmbat seen nekin, tey topp seen nafsu ; ay wax yu réy a ngi ball ci seen làmmiñ, waaye dañuy jay ñi ñuy yaakaare njariñ.

Góor-góorluleen

¹⁷Waaye yéen samay xarit, fàttalikuleen la leen ndawi sunu Boroom Yeesu *Kirist waxoon lu jiitu, ¹⁸ne leen : « Mujug jamono ay tiiñalkat dinañu feeñ, ñuy weddi Yàlla, ngir topp seen bakkan. » ¹⁹Ñooy féewale, te Xelum Yàlla nekkul ci ñoom ; nit kese lañu. ²⁰Waaye yéen samay xarit, doolewuleen ci seen yoonu ngëm wu sell, tey ñaan ci dooley *Xel mu Sell mi, ²¹ba saxoo mbëggeelu Yàlla, tey séentu yërmandey sunu Boroom Yeesu Kirist, mu tàbbal leen ci dund gu dul jeex. ²²Jubbantileen ñi am werantey xel, ²³ngeen musal ñale, jële léen ci sawara, te yërëm ñeneen ñi, waaye boole ci moytu, ba sib sax seen yére yi taq sobe.

Yàlla moo yelloo ndam

²⁴Yàlla mi leen mana aar ci gépp jeng te teewal leen fa kanam ndamam, ngeen ñàkk sikk te fees dell ak mbég ; ²⁵Yàlla miy kenn, di sunu Musalkat, yal na yelloo ndam ak màgg, kàttan ak nguur, jaar ci Yeesu *Kirist sunu Boroom, démb, tey, èllëg ba fàww ! Amiin.